

**NO SOALAN :25**

**PEMBERITAHUAN PERTANYAAN**

**DEWAN RAKYAT, MALAYSIA**

**DARIPADA           : Y.B. DATUK DR. EWON EDIN  
(RANAU)**

**PERTANYAAN       : LISAN**

**TARIKH           : 28.10.2015**

**Y.B. DATUK DR. EWON EDIN [ RANAU ]** minta **MENTERI KEWANGAN** menyatakan sama ada Kerajaan bersedia untuk memberikan pertimbangan khas bagi menurunkan kadar GST (*Good & Services Tax*) bagi negeri Sabah bagi mengimbangi kos sara hidup yang tinggi di negeri ini.

**JAWAPAN**

Tuan Yang DiPertua,

Untuk makluman Yang Berhormat, buat masa sekarang Kerajaan tidak berhasrat untuk mengkaji semula kadar Cukai Barang dan Perkhidmatan yang pada masa ini telah ditetapkan pada kadar enam peratus termasuk di negeri Sabah. Ini kerana kadar GST 6% adalah bersesuaian dengan keadaan ekonomi semasa setelah mengambil kira beberapa faktor termasuklah pengurangan cukai individu, cukai korporat dan bantuan kewangan seperti BR1M.

Bagi menjaga kepentingan rakyat secara keseluruhannya, termasuk di negeri Sabah, terutamanya golongan berpendapatan rendah, pelbagai barang dan perkhidmatan asas telahpun diberikan layanan GST berkadar sifar atau dikecualikan. Ini bermaksud barang dan perkhidmatan asas seperti beras, gula, tepung, sayuran, daging, ayam, perkhidmatan pengangkutan awam, pendidikan dan kesihatan, serta pembelian dan penyewaan rumah kediaman tidak dikenakan GST. Selain itu, jualan runcit minyak petrol RON 95, diesel dan LPG juga diberikan pelepasan daripada GST. Di samping itu, bagi mengimbangi peningkatan kos sara hidup dan mengurangkan impak pelaksanaan GST, Kerajaan telah memperkenalkan pakej bantuan seperti berikut:

- i. Melebarkan bantuan subsidi bersasar dengan meningkatkan amaun

pemberian BR1M. Dalam Bajet 2016, satu kategori baru juga diwujudkan iaitu penerima bantuan di bawah e-Kasih;

- ii. Kadar cukai pendapatan individu dikurangkan sebanyak satu hingga tiga mata peratusan. Melalui langkah ini, seramai 300 ribu orang yang kini membayar cukai pendapatan tidak lagi perlu bayar cukai pendapatan; dan
- iii. Cukai pendapatan individu juga distruktur semula di mana pendapatan bercukai pada kadar maksimum dinaikkan daripada melebihi RM100,000 kepada melebihi RM400,000. Kadar cukai maksimum yang kini 26% pula dikurangkan kepada 24%, 24.5%, dan 25% mulai tahun taksiran 2015. Mulai tahun taksiran 2016 pula, untuk memastikan struktur cukai pendapatan yang lebih progresif, dua banjaran pendapatan cukai baharu telah diwujudkan iaitu pendapatan daripada RM600,001 hingga RM1 juta dengan kadar cukai 26% dan pendapatan melebihi RM1 juta dengan kadar cukai 28%.

Selain daripada itu, pengenaan kadar cukai berbeza mengikut negeri boleh menimbulkan kesukaran dari segi mekanisme pelaksanaan GST.